



## Skýrsla um starfsemi Golfklúbbs Mosfellsbæjar

Rekstrarárið 2016-2017

Rekstrarárið 2016 – 2017 var bæði markvert og eftirminnilegt ár í rekstri klúbbsins. Þann 4. júní 2017 flutti Golfklúbbur Mosfellsbæjar félagsaðstöðu sína í nýtt hús við Hlíðavöll. Með því lauk langri bið eftir því að við Hlíðavöll risi varanleg aðstaða fyrir kylfinga. Húsið fékk nafnið Klettur og þegar leið á sumarið komst betri og betri mynd á lífið í nýrri aðstöðu.

En hvernig tókst til? Ekki er hægt að segja annað en að gríðarlega vel hafi tekist til. Húsið okkar er glæsilegt og hefur nú þegar sannað sig í mismunandi rekstri og virkni. Gestir klúbbsins hafa verið afar jákvæðir gagnvart húsinu og rekstrinum í því. Félagsmenn eru einnig ánægðir. Í þjónustukönnu klúbbsins var spurt hvort félagsmenn væru ánægðir með hvernig til hefði tekist og voru 93,4% ánægðir eða mjög ánægðir með það. Af 316 sem svoruðu þessari spurningu voru einungis 7 óánægðir eða mjög óánægðir með hvernig til tókst og því mikill meirihluti félagsmanna er sáttur.

Á næstu árum verður gríðarlega skemmtilegt og verðugt verkefni að þróa og þroska starfsemi klúbbsins í nýju húsi. Með þessu húsi opnast nýir möguleikar í rekstri og tekjuöflun fyrir GM. Nú þegar höfum við séð ýmsar nýjungar í rekstrinum og fleiri nýjungar eru í undirbúningi.

Vissulega er klúbburinn metnaðarfullur í rekstri sínum og stilla þarf af ýmis atriði í rekstri bæði klúbbsins og Kletts til að ná jafnvægi. En til framtíðar er ljóst að takist okkur vel til með að stilla reksturinn af munu skapast möguleikar til þess að efla og styrkja starfsemi klúbbsins til muna. Það er augljóslega spennandi verkefni.

Þó að mikil orka og tími hafi fari í að koma rekstri klúbbsins af stað í nýju húsi var almennur rekstur klúbbsins þó með nokkuð eðlilegum hætti. Öll innanfélagsmót og keppnir sem hefð er fyrir að halda voru á dagsskrá og gengu þau með nokkuð eðlilegum hætti. Þjónusta á vallarsvæðunum beið nokkra hnekki í vor og snemma sumars en þegar leið á sumarið batnaði þjónustan og var þegar sumri lauk komin í eðlilega farveg á báðum vallarsvæðum.

Í skýrslu þessari verður farið yfir helstu atriði varðandi starfsemi klúbbsins og nefnda á rekstrarárinu.

### Félagatal og félagsgjöld

Félagatal klúbbsins hefur verið fremur stöðugt síðustu 3 árin og engin breyting varð þar á í sumar. Við lok ársins töldust vera 1.030 félagsmenn í klúbbnum og er þá lítil breyting á milli ára.

Það er rétt að spyrja sig hvers vegna svo er? Við erum að sjá nýja félagsmenn ganga í klúbbinn í töluverðu mæli bæði á vorin og haustin. Það virðist alltaf vera töluverður hluti félagsmanna sem hættir í klúbbnum einnig og er sá fjöldi meiri en áætlanir gera ráð fyrir.

Nú þarf að leggjast í vinnu við að greina hvers vegna svo er. Taka þarf upp og greina öll vinnubrögð við útgáfu félagsgjalda, samskipti við félagsmenn og eftirfylgni með því. Þjónustukannanir haustsins gefa kannski ekki skýra mynd af hvað veldur en þó er það svo að úrsagnir félagsmanna eru meiri en góðu hófi gegnir. Á meðan þær eru með þessu móti mun ganga hægar að fjölga í klúbbnum en þörf er á.

## **Starfsmenn og rekstur**

Á árinu störfuðu að mestu 6 starfsmenn í fullu starfi hjá klúbbnum. Gunnar Ingi Björnsson sinnti störfum framkvæmdastjóra og þeir Einar Gestur Jónasson og Davíð Már Vilhjálmsson störfuðu sem vallarstjórar. Davíð Gunnlaugsson starfaði sem íþróttastjóri ásamt því að sinna margvíslegum verkefnum fyrir klúbbinn. Prúður Sigurðar hóf störf á skrifstofu GM við bókhald ásamt því að halda utan um þjónustu í skálum og móttöku hópa. Að síðustu bættist Joost van Bemmel matreiðslumaður í hópinn á vormánuðum.

Mörkuð hefur verið stefna af stjórni klúbbsins að leiða rekstur klúbbsins í aðrar áttir en venja er meðal golfklúbba á Íslandi. Þáttur veitingareksturs í starfsemi klúbbsins er meiri en gengur og gerist og áherslur aðra en venja er á.

Ástæður fyrir þessu eru í raun nokkra en helst ber að nefna það að væntingar klúbbsins um tekjur af starfsemi í Kletti eru umtalsvert meiri með þessum hætti en væri að öðrum kosti. Töluverð vinna hefur verið lögð í að greina stöðu sambærilegra klúbba og tekjum sem þeir hafa af húsnæði sínu.

Aðrar forsendur sem liggja að grundvelli þessari ákvörðun eru að ná upp meiri gæðum í mat og þá úrval matfangs sem í boði er. Efla og bæta þjónustu við félagsmenn og skapa klúbbnum aukna möguleika í starfi sínu fyrir alla félaga. Breikka hóp þeirra sem nýta aðstöðu klúbbsins og með því skapa aukið líf í húsnæðinu.

Það er því stefna stjórnar að reka Blik Bistro sex mánuði ársins sem veitingastað og kaffihús en sex mánuði á árinu sem veislu og viðburðarsal. Ýmsar jákvæðar afleiðingar verða af þessari tilhögun fyrir félagsmenn. T.d. verður hægt, ef áætlanir ganga eftir, að fækka lokunardögum á vellinum vegna hópa og móta. Stærri hópar munu sækja í meiri gæði í veitingum og aðstöðu og því skapa auknar tekjur.

Mikið vatn á eftir að renna til sjávar hvað þetta varðar á næstu árum. Klúbburinn er vissulega að taka ákveðin skref inn í hið óvissa en þó ber að hafa í huga að hér er einungis um útvíkkun á fyrirliggjandi starfsemi. Erlendis er það mjög þekkt að rekstur golfklúbba snúist að miklu leyti um þjónustu og veitingasölu og stór hluti tekna klúbba kemur frá þeirri starfsemi. Engin spor hafa verið mörkuð í sandinn um að fyrirkomulag sem þetta sé komið til að vera. Þvert á móti munum við hafa alla möguleika á að endurmeta þá stöðu ár eftir ár. Ef ákveðið er að fara í hefðbundnara fyrirkomulag varðandi veitingarekstur er þó ljóst að samningsstaða klúbbsins verður mun skýrari en annars hefði verið.

## **Fjármál GM og byggingarframkvæmdir**

Síðustu misseri hefur stjórni klúbbsins unnið að því að taka saman fjárhagslega stöðu klúbbsins og niðurstöður byggingarframkvæmda. Næstu ár munu snúast um að ná tökum á skuldastöðu klúbbsins sem er orðin allt of há.

Spilar þar langstærsta rullu þær byggingarframkvæmdir sem klúbburinn lagði af stað með til að reisa þá aðstöðu sem nú er risin við Hlíðavöll. Kostnaður við byggingarframkvæmdir reyndist meiri en lagt hafði verið upp með. Hægt er að tína til nokkuð mörg atriði sem hafa leitt til þessara niðurstöðu.

Ljóst er að lagt var upp með afar metnaðarfulla áætlun sem byggði á að klúbburinn næði mun betri tökum á byggingarkostnaði en hann gerði. Áætlanir um að taka framkvæmdir í skrefum reyndust ekki raunhæfar sökum bæði byggingarreglugerða, praktískra sjónarmiða um kostnað ásamt því að mörg verkefni þurfti að tækla sem ekki höfðu verið tekin með í áætlunum.

Stjórni klúbbsins stóð fram fyrir því síðasta vor að stoppa framkvæmdir og ná ekki því markmiði að flytja inn í aðstöðu klúbbsins eða fara fram úr þeim áætlunum sem uppi voru. Erfitt er að segja um hvernig

mál hefðu þróast ef fyrri kosturinn hefði verið valinn. Að minnsta kosti hefðu vandamál GM síst verið minni heldur meiri enda núna hægt að vinna með þá möguleika sem nýja húsið býður upp á.

Stjórn klúbbsins vinnur nú í samstarfi við bæjaryfirvöld og fjármálastofnanir að leita leiða til þess að leysa úr brýnasta vanda klúbbsins. Fyrir liggur núna staðfest framlag bæjarins til þess að halda áfram með neðri hæð hússins og æfingaaðstöðu þar ásamt því að hefja framkvæmdir við æfingasvæði úti. Það verður þó að viðurkennast að það hefur valdið töluverðum vonbrigðum að aðkoma bæjarins að þessu verkefni sé ekki meiri. Við erum að byggja hér íþróttamiðstöð sem er lyftistöng fyrir allt barna- og íþróttastarf og að ég tali ekki um allt samfélagið í Mosfellsbæ. Það á að vera metnaður hvers bæjarfélags að styðja myndarlega við íþróttastarf í golfi eins og annara íþróttu og hætta að tönglast stöðugt á því að hér sé verið að styrkja miðaldra karla og konur til að drekka bjór. Við sjáum það í nágrannasveitafélögum að þar er horft á þessa hluti með öðrum augum og er nýjasta dæmið bygging á frístdundamiðstöð hjá golfklúbbnum Leyni. Golfklúbbur er fyrst og fremst íþróttafélag og við trúum því að með auknu samtali við bæjarfélagið muni sú staðreynd verða almennt viðurkennd og okkur takist að halda áfram að byggja upp íþróttasvæði og aðstöðu í fremstu röð.

Hvað okkur félagsmenn í klúbbnum varðar er mikilvægt er að við snúum bökum saman um starfsemi klúbbsins og leitum allra leiða saman til þess að styrkja og efla klúbbinn okkar.

### **Vallarsvæði, umhirða og hringjafjöldi**

Örlítill seinkun varð á opnum vallarsvæða klúbbsins í vor miðað við síðustu ár. Hlíðavöllur opnaði fyrir leik á sumarflatir og teiga 28. apríl en síðasti dagur á sumarflötum var síðan föstudaginn 3. nóvember. Er það ívið styttri opnum en 2016 þó völlurinn hafi opnað í apríl og lokað í nóvember eða í fulla 6 mánuði. Bakkakot opnað 13. maí og lokaði á sumarflatir 22. október. Er það nokkuð í takt við opnum vallarins frá aldamótum þó vissulega sé haustopnun farin að lengjast umtalsvert miðað við það sem áður þekktist.

Leikinn hringjafjöldi á völlunum okkar hélst nokkuð í takt við undanfarin sumur. Örlítið fækkan varð á leiknum hringjum á Hlíðavelli þetta sumarið eða 1,5% færri hringir. Í Bakkakoti voru hringir aftur á móti 7,56% fleiri en sumarið áður.

### Bakkakot

| Ár   | Umferð | mism. | %      | opnun  | lokun  | opnir dagar | mism. | spil pr.dag |
|------|--------|-------|--------|--------|--------|-------------|-------|-------------|
| 2013 | 12778  | 0     |        | 18.maí | 21.okt | 157         | 0     | 81          |
| 2014 | 13326  | 548   | 4,29%  | 10.maí | 23.okt | 167         | 10    | 80          |
| 2015 | 15932  | 2606  | 19,56% | 16.maí | 26.okt | 164         | -3    | 97          |
| 2016 | 14618  | -1314 | -8,25% | 16.maí | 4.nóv  | 165         | 1     | 89          |
| 2017 | 15752  | 1134  | 7,76%  | 13.maí | 3.nóv  | 167         | 2     | 94          |

### Hlíðavöllur

| Ár   | Umferð | mism. | %       | opnun  | lokun  | opnir dagar | mism. | spil pr.dag |
|------|--------|-------|---------|--------|--------|-------------|-------|-------------|
| 2013 | 23067  | 0     |         |        |        |             |       |             |
| 2014 | 25814  | 2747  | 11,91%  |        |        |             |       |             |
| 2015 | 21722  | -4092 | -15,85% |        |        |             |       |             |
| 2016 | 23391  | 1669  | 7,68%   | 28.apr | 3.nóv  | 190         | 190   | 123         |
| 2017 | 23041  | -350  | -1,50%  | 28.apr | 14.nóv | 201         | 11    | 115         |

Ástand beggja vallarsvæða var með ágætum í sumar. Báðir vellir komu vel undan vetri og tóku hratt við sér í maí mánuði og var ástand á flötum og teigum orðið gott strax um mánaðarmótin maí / júní. Bakkakot var í sérstaklega góðu standi í sumar en þær skemmdir sem komu upp vorið 2016 gréru vel og var völlurinn í miklum blóma.

Hlíðavöllur var í góðu standi í vor og framan af sumri. Eftir meistaramót kom fremur þurrt tímabil í veðri. Á svipuðum tíma hafði verið ráðist í yfirsáningu á flötum Hlíðavallar til að þetta grasið og viðhalda grastegundum í flötum. Þetta olli því að um mitt sumar hrakaði flötum vallarins verulega og tók 3-4 vikur að vinna það til baka.

Það er óhægt að segja að ástand vökvunarkerfis á báðum vallarsvæðum sé afar slakt. Sérstaklega er þetta bagalegt á Hlíðavelli sökum stærðar vallar, flata og teiga. Gera þarf ráðstafanir í framtíðinni til að reyna að tryggja betri vökvun á vellinum, jafnvel þó það þýði aukin rekstrarkostnað, sérstaklega þegar aðgerðir eru í gangi á vellinum. Til framtíðar mun þó ekki duga neitt annað en að koma upp sjálfvirku vökvunarkerfi eins og aðrir 18 holu vellir á höfuðborgarsvæðinu búa yfir. Rétt rakastig í flötum og teigum verður einungis tryggt með þeim hætti.

Að öðru leiti er farið yfir vallarsvæði og umhirðu í skýrslu vallarstjóra.

## Framkvæmdir

Framkvæmdir á vallarsvæðum klúbbsins voru ekki miklar á síðasta starfsári. Skýrðist það vissulega af byggingu nýrrar félagsaðstöðu við Hlíðavöll. Byggingarframkvæmdir stóðu yfir í rétt rúma 14 mánuði en flutt var inn í nýtt hús sunnudaginn 11. júní. Smærri framkvæmdir og frágangur héldu þó áfram og opnaðu t.d. eldhús ekki formlega fyrr en 19. júní.

Það er mikið verk að flytja inn í aðstöðu sem þessa. Í raun eru allir ferlar og öll atriði starfseminnar tekinn upp og endurskilgreind. Félagsmenn og gestir sýndu þessu mikinn og góðan skilning og nýja húsið verður gríðarleg lyftistöng fyrir alla starfsemi klúbbsins þegar fram líða stundir. Ekki er hægt annað en að nefna vinnuframlag félagsmanna við þessa framkvæmd – sérstaklega á lokaspáttinum.

Haldin var nafnasamkeppni um nafn á nýja húsið. Dómnefnd valdi húsinu nýtt nafn en alls bárust 271 tillaga í keppnina um 193 einstök nöfn frá alls 91 aðila. Húsið fékk nafnið Klettur enda mun það standa sem undirstaða allrar starfsemi GM um ókomna tíð. Opnaður var einnig nýr veitingastaður í húsinu en hann fékk nafni Blik Bistro & Grill.

Nú liggur fyrir að halda áfram að forma og móta starfsemi GM í nýju húsnæði. Vonandi verður starfsemi á efri hæð hússins komin í endanlegar skorður næsta sumar og mun halda áfram að batna og nýta alla þá möguleika sem í húsnæðinu felast. Á neðri hæð hússins er nú í gangi vinna við að skipuleggja og koma af stað frekari framkvæmdum. Stefnt er að flotun hæðarinnar núna í desember 2017 og í janúar er stefnt að því að hefja uppsetningu veggja og innréttingu hæðarinnar. Vonandi ber okkur gæfa til þess í sameiningu að taka æfingaaðstöðuna niðri í notkun sem fyrst enda vantar hana sárlega fyrir okkar afreks- og ungkylfinga ásamt hinum almenna félagsmanni.

Þó svo að vallarframkvæmdir hafi ekki verið miklar voru þær þó einhverjar. Töluberð vinna fór í frágang á lóð í kringum Klett og tengingum við völlinn. Var þeim að mestu lokið í um mánaðarmótin júlí / ágúst. Haldið var áfram að taka við mold í gömlu námuna og styttist nú í að hægt verði að sá í og loka námunni. Stefnt er að sáningu í öll stór opinн svæði snemma næsta vor og ættu þau að vera orðin hálf grón um mitt næsta sumar.

Eins og áður kemur fram hefur klúbbnum verið úthlutað Íslandsmótinu í höggleik árið 2020 og mun mótið fara fram á Hlíðavelli. Við höfum því 2 heil ár til þess að undirbúa og hlúa að vellinum þannig að hann skarti sínu fegursta þegar keppendur mæta til leiks 2020. Áhersla verður lögð á að græða upp svæði og loka framkvæmdum sem opnaðar hafa verið. Stefnt er á einhverja fjölgun teiga og mögulega einhverjar smærri vallarframkvæmdir að mestu leiti verður völlurinn leikinn eins og hann er í dag.

Nánar er farið yfir framkvæmdir á vallarsvæðum í skýrslum vallarstjóra.

## Mótahald og innanfélagsstarf

Öll helstu innanfélagsmót sem haldin voru árið 2016 voru endurtekin 2017. Liðum í VÍKINGdeildinni fjöldaði í 19 og var keppni hörð og skemmtileg og breytingar sem gerðar voru á forgjafarreglum jöfnuðu mjög keppni og voru vel heppnaðar. Meistarar í VÍKINGdeildinni árið 2017 var liðið ML Group.

Sömu sögu var að segja af Titleist holukeppninni en keppt var í karla og kvennaflokkum. Holumeistarar GM voru þau Hekla Daðadóttir í kvennaflokk og Ólafur Örn Jónsson. GM mótaröðin var á sínum stað í sumar og veitt voru verðlaun fyrir stigahæstu félagsmennina á 66° listanum – Stigalista félagsmanna. Þar voru það mæðginin Hekla Daðadóttir kvenna megin og Andri Már Guðmundsson hjá körlum sem hlutskörpust reyndust.

Þriðja árið í röð var uppskeruhátið klúbbsins haldin og var hún að þessu sinni í nýju aðstöðunni okkar. Um 100 félagsmenn komu saman og fögnum lokum tímabilsins saman með frábærum mat. Veitt voru verðlaun fyrir helstu keppnir sumarsins. Þórir Sæmundsson fékk framfarabikarinn 2017 lækkaði forgjöfina sína úr 54 í rúmlega 20. Glæsilegur og árangur og ljóst að það eru ekki margir sem leika þetta eftir.

Félagsmaður ársins var valinn Sigurður Geirsson og er hann afar vel að því kominn. Hann hefur verið afar virkur félagsmaður í GM undanfarin ár og er alltaf verið boðin og búin til þess að vera klúbbsnum til aðstoðar í öllum þeim verkefnum sem óskað er eftir. Hann er iðulega með myndavélina á lofti ásamt því að sjá til þess að allt fari eftir lögum og reglum.

Kvennkylfingur ársins árið 2017 er Heiða Guðnadóttir en hún var lykilmaður í sveit GM í Íslandsmóti golfklúbba ásamt því að vera krýnd klúbbmeistari kvenna á Meistaramótinu. Karlkylfingur ársins árið 2017 var valinn Björn Óskar Guðjónsson en hann er að vinna þennan titil í fyrsta skipti. Það eru fáir sem leggja jafn mikið á sig á æfingasvæðinu og þessi kylfingur en hann lék afar vel í sumar.

Meistaramót GM fór fram í byrjun júlí eins og vera ber. Góð þátttaka var á mótinu en fjölgun var á keppendum á milli ára. Klúbbmeistarar voru krýndir Kristján Þór Einarsson og Heiða Guðnadóttir. Kristján Þór tryggði sér titill með lokapútti sínu á 72. holu en þúttið var ótrúlegt og var einmitt valið högg ársins á Uppsakeruhátiðinni. Heiða sigraði afar glæsilega í mótinu og en hún lék af öryggi á lokahringum og bar sigur úr býtum fyrir vikið.

Gríðarlega góð stemming var á lokahófið Meistaramótsins og sprengdi mæting í lokahófið öll viðmið. Húsið var þétt setið og verkefni til framtíðar að huga að skipulagi kvöldsins þar sem hið nýja glæsilega hús reyndist full lítið fyrir þessa stærstu hátið klúbbsins. Sem er vissulega afar áhugavert.

Rétt er að minnast á Bændaglímu klúbbsins sem fram fór sama dag og Uppsakeruhátiðin. Kylfingar fengu hreint ótrúlegan dag og skartaði völlurinn sínu fegursta í logni og sumarveðri í enduðum september. Eins og fyrrí ár var alveg fullt í mótið enda það hin mesta skemmtun.

Opin mótið voru haldin í sumar en heldur minna var um þau en oft áður. Voríð var erfitt veðurfarslega séð og hefðbundin vormót ekki haldin vegna veðurs. Í maí og júní riðlaðist starfsemi klúbbsins töluvert

og kom það niður á móta haldi eins og öðrum þáttum. Flest hefðbundin opin móti voru haldin og var mæting á þau móti sem haldin var almennt góð.

Vetrarstarfssemi klúbbsins er á sínum stað enda fastur liður fyrir marga félagsmenn að sækja mótin hvort sem leikið er utandyra á vetrarflötum eða púnnað á efri hæð vélageymslunnar.

## Þjónusta við félagsmenn

Þótt mikið gengi á í starfsemi klúbbsins var reynt að halda þjónustustigi við félagsmenn eins háu og mögulegt var. Það gekk eftir að mestu leiti en þó ýmislegt sem ekki náðist að huga að með sama hætti og verið hefur.

Útgáfu GolfMos var haldið áfram en blaðið er hugsað sem upplýsinga og kynningarblað fyrir starfsemi klúbbsins. Gefin voru út 3 tölublöð á árinu miðað við 4 árið áður. Maí tölublaðið var prentað og dreift á 35 þúsund heimili á höfuðborgarsvæðinu til kynningar á klúbbnum og starfsemi hans. Síðasta tölublað ársins var gefið út í byrjun desember en í því er farið yfir innanfélagsstarf síðasta sumars. Félagsmenn fengu einnig reglulega fréttapósta um starfsemina ásamt því að FB síða GM var virk og öflug allt rekstrarárið.

Þjónustukönnun GM var keyrð á haustmánuðum eins og tvö síðustu ár. Voru niðurstöður hennar í takt við niðurstöður síðustu ára og verða þær tekna og unnar áfram í veturn til þess að bæta starfsemi klúbbsins. Alls bárust 395 svör miðað við 415 árið 2016.

Almennt virðast félagsmenn vera enn afar sáttir við starfsemi klúbbsins en 89% félagsmanna GM eru ánægðir eða mjög ánægðir með klúbbinn sem er aukning um 2% á milli ára. Þeim sem eru hvorki né ánægðir með GM eru 8% og þeir sem eru óánægðir eða mjög óánægðir eru 3%.

## Afreksstarf

Óhætt er að segja að árangur sumarsins hafi verið góðu í afreksstarfi GM. Við áttum marga kylfinga á mótaröðum GSÍ sem náðu góðum árangri. María Eir Guðjónsdóttir, Kristófer Karl Karlsson, Andri Már Guðmundsson og Ragnar Már Ríkarðsson komust öll á verðlaunapall á Íslandsbankamótaröðinni.

Okkar bestu kylfingar léku frábært golf í Meistaramóti GM og verður einvígí Björns Óskar og Kristjáns Þórs lengi minnistætt en skorið hjá þeim var með því besta sem hefur sést í Meistaramóti GM.

Við tefldum fram sterkum liðum í Íslandsmóti golfklúbba í ágúst í öllum flokkum. Þar áttum við 3 lið á verðlaunapalli, Karlasveit GM sem náði 3. sæti í Kiðjabergi, drengjasveit GM 18 ára og yngri urðu Íslandsmeistarar á Hellu og sveit eldri kylfinga sigraði glæsilega í Öndverðanesi. Frábær árangur og greinilegt að liðsheildin er sterkt í Mosfellsbænum.

## Starfsemi stjórnar og nefnda

Stjórn klúbbsins fundaði alls 13 sinnum yfir starfsárið en fastir fundir stjórnar eru einu sinni í mánuði. Hlí var gert á fundum stjórnar yfir hásumarið en að öðru leiti voru fundir stjórnar reglulegir.

Allar helstu nefndir klúbbsins störfuðu á síðasta starfsári – þó mismikið. Sem betur fer þurfti t.d. Aganefnd klúbbsins ekki að starfa neitt þar sem engin agamál komu inn á borð til hennar á árinu.

Kvennanefnd stóð fyrir öflugu starfi meðal kvenna í klúbbnum og sóttu konur viðburði á vegum nefndarinnar. Vallarnefnd klúbbsins fundaði nokkuð oft og stendur vinna yfir hjá þeim varðandi mörg atriði er snúa að vallasvæðum klúbbsins.

Mótanefnd klúbbsins kom myndarlega að framkvæmd opinna móta og annaðist ræsingu, skráningu skors og utan umhald úrslita. Afreksnefnd klúbbsins hélt utan um afreksþætti starfseminnar og hélt til að mynda glæsilegt Unglingaeinvígi í lok ágúst eins og hefð hefur myndast fyrir.

Ég get sagt það að þetta fyrst ár mitt sem formaður GM hefur verið viðburðaríkt, erilsamt en umfram allt mjög gefandi. Ég hef náð að kynnast betur mikið af góðu fólk og fylgjast með þeim krafti sem býr í golfklúbbi Mosfellsbæjar. Ég hlakka til að vinna áfram að því að gera veg GM sem mestan með því góða fólk sem hér er bæði starfsmenn og stjórn. Ég vil þakka stjórnarmönnum fyrir samstarfið og þá sérstaklega Kristni Wium og Völu Valtýsdóttur sem ætla að láta gott heita í bili.

**Fyrir hönd stjórnar GM,**  
Kári Tryggvason, formaður